



## **KOMUNIKADO PA PRENSA**

*Fecha* 19 sept. 2012      *Account Manager* Jhanirha Anita      *Email* [jhanirha.anita@gobiernu.cw](mailto:jhanirha.anita@gobiernu.cw)      *Nr.*

### **OUTORIDAT DI AVIASHON SIVIL DI KÒRSOU TA TRAHANDO DURU PA PONE KÒRSOU BEK DEN KATEGORIA 1 BOU DI REGLANAN DI ICAO**

**Willemstad** – Relashoná ku resien publikashon den un medio di komunikashon lokal, Outoridat di Aviashon Sivil di Kòrsou kier a trese e siguiente akklarashonnan tokante e situashon di e direktora di e departamentu i tambe e prolongashon di kontrato di Sr. Jay Rodriguez relashoná ku trabounan ku ta tumando lugá pa trese Kòrsou bek den kategoria 1 mas pronto posibel.

Aktualmente e direktora di e Outoridat di Aviashon Sivil di Kòrsou, sra. mr. Sujiane Concincion-Quirindongo, ta ku vèrlòf pendiente su posibel traspaso pa un otro departamentu di gobièrnu. Pa e motibu aki sra. mr. Giselle N. Hollander, Direktor di e Sektor di Tráfiko i Transporte, ta aktua komo direktor suplente durante su ousensia.

Kontrali na e publikashon ariba menshoná, Outoridat di Aviashon Sivil di Kòrsou ta trahando for di sèptèmber 2011 a base di un plan di akshon pa garantisá ku Kòrsou ta regresá na kategoria 1. Den transkurso di e lunanan ku a pasa tabata tin vários training i workshops pa personal, asistensia di ekspertonan di aviashon internashonal, koperashon ekstenso ku hopi aktor den e mundu di aviashon lokal i ta trahando tambe riba e leinan nesesario pa aviashon.

Den yanüari 2012 e Outoridat di Aviashon Sivil Merikano (FAA) a tuma e desishon di degradá Kòrsou pa kategoria 2 a base di un inspekshon ku a hasi na Kòrsou na Sèptèmber 2011. Durante di e inspekshon a resultá ku Kòrsou no tabata kumpliando ku tur e eksigensianan di aneksonan 1, 6 i 8 di e asina yama tratado di Chicago. E tratado aki tei pa garantisá seguridat di aviashon internashonal.

FAA ta kategorisá paisnan sea ku kategoria 1) kual ta nifiká ku e pais ta kumpli ku tur e eksigensianan òf kategoria 2) kual ta nifiká ku e pais no ta kumpli ku tur e eksigensianan. No ta eksistí un kategoria 3 i ta e pais ta ser degradá i no su aeropuerto.

Komo ku FAA tambe mester kumpli ku e eksigensianan di e Organisashon Internashonal di Aviashon Sivil (ICAO), meskos ku Kòrsou komo pais mester kumpli ku nan, a adaptá e strategia di traha i resientemente a disidí pa akudí na ICAO mes pa haña e asistensia nesesario. Pa e motibu aki a disidí di no ekstendé e kontrato ku tabata tin ku e eksperto di FAA, sr. Javier Rodriguez.

Den 2003 i den 2008 e Organisashon Internashonal di Aviashon Sivil (ICAO) a hasi inspekshonnan na Kòrsou i for di e tempu ei a konstatá ku Kòrsou no tabata kumpli ku e



## **KOMUNIKADO PA PRENSA**

*Fecha*                                      *Account Manager*                                      *Email*                                      *Nr.*  
eksigensianan. Si FAA lo a hasi un inspekshon for di den e añanan ei lo a kategorisá Kòrsou komo kategoria 2.

Te ku presupuesto 2012 no a tene kuenta ku e finansa nesesario pa koregí tur e puntonan ku ICAO a indiká e tempu ei. Pa e motibu aki no tabata tin sèn disponibel pa a koregí tur e puntonan ku FAA a indiká mesora na e momentu ku a kategorisá Kòrsou komo kategoria 2.

Outoridat di Aviashon Sivil di Kòrsou ta sigui konta ku e koperashon valioso di tur aktor envolví, tantu den gobièrnu komo pafó di gobièrnu, pa asina garantisá ku nos pais ta bai bek na kategoria 1 mas pronto posibel.